



**PRIMEIRO
MINISTRO**

**ALOKUSAUN
SUA EXELÉNSIA PRIMEIRU-MINISTRU
KAY RALA XANANA GUSMÃO NIAN**

IHA OKAZIAUN

4.^a KONFERÉNSIA KOMUNIDADES LUZO-AZIÁTIKAS

**Sentru Konvensoens Díli
29 junhu 2025**

Suas Exelénsias, Ilustres Dignitáriu Representantes husi Delegasoens Komunidades Luzo-Aziátikas

Ilustres Representantes husi Organizasoens Internasionais

Suas Exelénsias, Senhores Membrus Korpu Diplomátiku
Distintus Deputadus no Membrus Governu
Exelénsias, Distintus Konvidadus
Karus Estudantes,

Senhoras no Senhores,

Ho onra boot no laran haksolok tebes mak ami simu ita-boot sira iha Dili, ba primeira vez, iha eventu ida ne'ebé dedika ba uniaun ho prezervasaun Komunidades Luzo-Aziátikas.

Kuarta Konferénsia Komunidades Luzo-Aziátikas ida-ne'e, tuir ha'u haree, istória tebes! La'ós de'it tanba ninia abranjénsia (ka, dimensaun) no partisipasaun ne'ebé aas husi comunidade sira, maibé, no liuliu, tanba mensajen importante ida ne'ebé ita hakarak partilha ho mundu tomak, ne'ebé reforsa liután iha loron rua dahikus ne'e.

Hamutuk iha Diversidade!

Independentemente husi buat hotu ne'ebé haketak ita – jeografias, sistemas polítikus ou ideolojias, no mós perkursus istórikus no kulturais espesífikus ne'ebé la hanesan – maibé iha buat ne'ebé tau ita hamutuk ho forma singular: ita-nia ansestralidade (katak, legadu husi bei'ala sira) ne'ebé hanesan.

No ida-ne'e signifika katak ita iha identidade partilhada ida ne'ebé halo ita la hanesan ho comunidade sira seluk iha mundu. Signifika mós katak ita hotu hamutuk, ho forma espontânea, tanba lasus amizade ne'ebé kle'an tebetebes no vontade atu halo kooperasaun hamutuk.

Uniaun iha diversidade, buat ne'ebé nunka, hanesan agora, sai pertinente tebetebes! Iha mundu ida ne'ebé fahe malu no masakradu tanba konflitus, instabilidade ho funu, kualker inisiativa ne'ebé hakarak institusionaliza valores solidariedade, kooperasaun ho umanizmu, ne'e hanesan esperansa rohan oan ida!

Tanba ne'e mak ita hotu mai hamutuk iha-ne'e atu celebra entendimentu komun ida: katak iha Ázia, maski ho distánsia fízika no temporal husi ita-nia bei'ala sira, sei iha nafatin comunidade sira ne'ebé ko'alia, ou uluk ko'alia, lian ne'ebé hanesan, ne'ebé partilha trasus kulturalis ho valores ne'ebé hanesan.

No valor hirak-ne'e substansia (ka, fundamenta) iha pás, iha amizade no iha dignidade.

No bele expresa liuhosi arte, dansa, múzika, kantares, katak, expresaun kultural sira ne'ebé furak tebetebes ne'ebé ita bele hetan oportunidade haree rasik iha lora sira dahikus ne'e iha Díli.

Exelénsias

Senhoras no Senhores

Karus Estudantes,

Timor-Leste, hanesan ita-boot sira hatene, iha pasadu ida ne'ebé difísil tebes tanba kolonizasaun, tuir fali mai iha períodu todan boot ida tanba okupasaun ilegal no violenta.

Maibé, ami, timoroan sira rasik, mak hakarak hakat liu ami-nia laran susar no terus boot ne'ebé rai hela iha memória kolektiva hodi rezolve ami-nia problemas no konflitus, internus ho externus, liuhosi rekonsiliaun.

Ho korajen no diálogo barak ami pratika buat ne'ebé ami konsidera hanesan justisa ho vizaun ba futuro, katak, hasoru, rekonhese no simu ho hakat liu tiha, nu'udar Povu no nu'udar Estado, trauma sira husi funu ho kontextus ideolójikus ne'ebé liga ho rejimes istórikus, hahú husi rejime kolonial to'o rejime gerra fria (ka, funu malirin).

Simu no hatene istória, no mós konfia iha sistema internacional ida ne'ebé bazeia iha regras, ne'e mak triunfu (ka, vitória) hirak ne'ebé ami bele partilha ho mundu. Triunfu hirak-ne'ebé permite ami hakat liu tiha izolamentu hodi hetan korajen no reziliénsia atu bele kontinua resiste, no, to'o ikus, hetan ami-nia soberania tomak.

Prosesu deskonstrusaun la'ós de'it liberta ami husi sentimentus korrozivus (ka, destrutivus), maibé mós kria espasu nesesáriu ba buat ne'ebé realmente importa iha presente: harii Estadu ho Nasaun no servisu ba dezvoltamentu sustentável ami-nia país nian.

No ezemplu ida-ne'e nunka iha relevánsia ida boot hanesan ohin loron. Mundu agora hasoru dezafius jeopolíticos, sosioekonómikus no ambientais graves, dezafius ne'ebé só bele hetan resposta bainhira eziste umanizmu, ho baze iha valores ne'ebé aas liu hanesan solidariedade, toleránsia no kooperasaun.

Infelizmente, ohin-loron ita haree, katak kuantu mais iha poder no kapasidade ekonómika, intranzijénsia (ka, intoleránsia) mós sai boot liután. No, ida-ne'e, Senhoras no Senhores, mak prinsipal fraqueza mundu dezvoltadu nian: buka nafatin atu tau aas liu intereses ekonómikus hodi prejudika dignidade umana.

Ida-ne'e bainhira verdadeira korajen povu ida-nian bele hatudu liuhusi oinsá buka nafatin solusoens dame ba nia problemas no la'ós intranzijénsia husi konfliktu.

Ha'u fiar katak, iha konferénsia ne'e iha Díli, liuhosi uniaun ne'ebé metin liután entre comunidade ho povu sira, ita la'o daudaun tuir dalan seguru ba dezvoltamentu no bein-estar husi ita-nia comunidades.

Exelénsias

Senhoras no Senhores,

Hanesan ita-boot sira hatene, Timor-Leste mak úniku país husi CPLP ne'ebé lokalizadu iha Oriente. Tanba ne'e, ami iha koneksaun partikular ho comunidades luzo-dexendentes, minoritárias, husi Sri Lanka, husi Malásia, Myanmar, Tailândia, Xina, Indonézia ho Índia, hodi reforsa afinidade natural ne'ebé ami iha ho rejiaun aziátika, agora mós liuhusi dimensaun foun ida-ne'e.

Ita hotu rekonhese malu la'ós de'it tanba heransa kultural, relijioza no lingístika, maibé tanba ita-nia vulnerabilidades komuns, tanba dezafiu sira ne'ebé ita ultrapasa ona durante sékulus, no, liuliu, tanba vontade atu kria kondisoens ba bein-estar ita-nia comunidades nian.

Ho baze iha vontade ba rekonhesimentu ho diálogu ne'e mak prekursores husi Konferénsia Comunidades Luzo-Aziáticas ne'e halibur-malu iha 2016. Tanba ne'e mak ha'u la bele haluha agradese ba comunidade luzo-dexendente husi Bairru Portugés iha Malaka tanba promove insiativa unfikadora no barani ida-ne'e, ne'ebé lori ita hotu, ohin ne'e, mai hamutuk iha Díli.

Vizaun ho vontade atu prezerva patrimóniu kultural úniku no komun ida, mai husi comunidade ki'ik sira ne'ebé buka fatores aproximasaun atu bele pratika diálogu, respeito ho troka experiéncias kona-ba dezafius komuns, ne'e buat ida ne'ebé Timor-Leste labele husik leet de'it.

Husi eventu ida-ne'e, aleinde festa kultural boot ida, sei rai hela testemunhu klaru ida iha Deklarasaun Díli kona-ba kriaasaun Asosiasaun Comunidades Luzo-Aziáticas. Institusionalizasaun Asosiasaun ne'e nian, ho baze jurídika iha Díli, halo ami sente orgulhu boot.

Ha'u fiar katak, ho apoiu husi comunidade ida-idak nia país, ho apoiu husi CPLP no husi parte hotu-hotu ne'ebé hakarak mai hamutuk iha misaun ida-ne'e hodi halo promosaun comunidade sentenária sira ne'ebé ho importante rikeza kultural no patrimonial, ita bele mós promove pás, toleránsia ho dezvoltamentu ba ita-nia povu sira.

Ha'u termina hodi agradese la'ós de'it ba comunidade sira hotu ne'ebé mai to'o Timor-Leste partisipa iha eventu ida-ne'e, maibé mós ba grupu kultural sira hotu ba sira-nia magnífikas representasoens, no bá Komisaun Organizadora Konferénsia ba dedikasaun no exelente trabalhu ne'ebé halo.

Liafuan ida tan hanesan espesial apresu, ba prezensa Sekretáriu Ezekutivu ho Representantes husi Países CPLP ne'ebé mai hariku liután konferénsia ne'e.

Hein katak loron ohin mai hatur-metin liután tinan atus-ba-atus amizade ho solidariedade entre ita nia povu sira, hodi reforsa importante sentimentu pertensa ho felisidade ita hotu nian.

Muito obrigadu tanba ita-boot sira bele mai iha-ne'e, hodi partilha ita-nia lasus amizade no, klaru, ita-nia futuru.

Kay Rala Xanana Gusmão